



Ulloq 6. juuni 2024

## **Inatsisartut suleriaasianni § 37 imm. 1 naapertorlugu Naalackersuisunut apeqquteqaat imaattoq matumuuna saqqummiuppara.**

### **Naalackersuisunut apeqqutit:**

§ 37 naapertorlugu, nr. 54/2024, apeqquteqaatigineqarsimasoq kiisalu Inatsisartuni, UKA23/116, aalajangiiffigineqarsimasoq innersuussutigalugit Kalaallit Danmarkimiittut inuiattut ikinnerussuteqartut akuerisaanissaannik suliap piaartumik ersarissumillu malitseqartinneqarnissaata pingaaruteqassusaa siunertaralugu allakkagaqarninni matumani naqissuserusuppara.

§37 naapertorlugu apeqquteqaammii, Nr. 54/2024, akissuteqaatersi innersuussutigalugu, oqariartuuteqarpusi suliamut uunga atatillugu naalagaaffik, 2024-imi upernaap ingerlanerani, kaammattuummik nassiussivigineqassasoq.

Tamanna malinnaavigiumallugu suliamut killiffik qanorlu ingerlanneqarsimanera annetunerusumik paasisaqarfigerusuppara:

1. **Naalackersuisut kalaallit Danmark-imi najugaqartut inuiattut ikinnerussuteqartut akuerineqarnissaat pillugu naalagaaffimmut attaviginninnikuuppat?**
  - a. **Taamaassimappat, attaveqarneq tamanna qanoq kinguneqarpa?**
  - b. **Taamaassimanngippallu, attaveqarnerup qaqugukkat pinissaa naatsorsuutigineqarpa?**
2. **Naalackersuisut naalagaaffiup tungaaninngaanniit akissummik tingusaqarnikuuppat?**
  - a. **Taamaassimappat, akissut tamanna qanoq imaqarpa?**
  - b. **Taamaassimanngippallu, qaqugu akissuteqartoqarnissaa naatsorsuutigineqarpa?**
3. **Naalackersuisut qanoq pilersaaruteqarpat naalagaaffiup oqartussaasui peqatigalugit, inatsisit sinaakkutaasut marluk pineqartut Kalaallinut Danmarkimi najugaqartunut qulakkeerinninnissaanut?**
4. **Kalaallit Danmarkimi najugaqartut pisinnaatitaaffiisa kinaassusaasalu illersorneqarnissaat pillugit pilersitsiniarnernik suliniutinilluunniit allanik pilersaaruteqartoqarpa?**
5. **Suliap matuma ingerlanneqarnerani Naalackersuisut kalaallinut Danmarkimi najugalinnut qanoq akuutitsiniarpa?**
  - a. **ilaatigut soorlu, Sinniisoqarfik Københavnimiittoq imaluunnii kattuffiit allat Kalaallit Nunaata, Aningaasanut Inatsit aqqutigalugu, tapiiffigisartagai.**

(Inatsisartunut ilaasortaq Kuno Fencker, Siumut)

### **Tunngavilersuut:**

Pingaaruteqarluinnarpoq Naalackersuisut inerniliussatut siunnersuutit malinnaavigiinnarnagit, kisiannili aamma kattuffiit akisussaasut, soorlu sinniisoqarfik Københavnimiittoq, isumalioqatigiisitap angalasarnermini tamatingorluinnagajak attavigisarsimasaa. Uani Kalaallit



pisinnaatitaaffii kinaassutsiminnillu ilisarnaataat pineqarput, taamaattumillu akuutinneqarnissaat pingaaruteqarluinnarpoq uani inuunerat siunissaallu pineqarmat.

Inuiattut ikinnerussuteqartut akuerisaarneq najoqqutassiaannaanani, aammattaaq kalaallit danmarkimi najungaqtut immikkuullarissumik piorsarsimassutsikkut pigisaqarnerannut kiisalu oqaluttuarisaanikkut kungeqarfiup ataani inissisimanermut akuersaerneruvoq.

Taamaattumik Naalackersuisut kaammattorusuppakka alloriarsimanerit suunerinnik Inatsisartut ilisimatinneqarnissaannik, taamalilluni qulakkeeqqullugu, uagut qinikkatut, suliamut pingaarutilimmut matumunnga tunngatillugu malinnaatinneqarnitsigut naapertuuttumik immersueqataasinnaanissarput.

Uagummi pisussaaffigaarput kalaallit Danmarkimi najugallit illersorneqarlutik naleqartitaallutillu misigitinnissaat, kiisalu pisinnaatitaaffimmikkut kinaassutsimikkullu naalagaaffimmi innuttaasut allat naligalugit akuersaerneqarnissaat.

Apeqqutigineqartut ullut suliffiusut qulit iluanni akeqquneqarput.